

ALL INDIA RADIO

RNU : : KOLKATA

BENGALI TEXT BULLETIN

DATE – 13.12.2017

TIME – 01.40 P.M

মুখ্যমন্ত্রী মমতা ব্যানার্জী আজ বাঁকুড়ার ইন্দপুর বাগডিহা ময়দানে এক জনসভায় অংশ নিচ্ছেন । জঙ্গলমহল টুর্নামেন্টের পরিসমাপ্তি তিনি ঘোষণা করবেন । জঙ্গলমহলের ছেলে-মেয়েদের নিয়ে এই টুর্নামেন্টে তীরন্দাজি, ফুটবল সহ বিভিন্ন ক্রীড়া প্রতিযোগিতার আয়োজন করা হয় । এছাড়াও বেশ কয়েকটি সরকারি প্রকল্পেরও উদ্বোধন করবেন তিনি ।

এদিকে, ভিনরাজ্যে কাজ করতে যাওয়া বাংলার শ্রমিকদের মুখ্যমন্ত্রী রাজ্যে ফিরে আসার আহ্বান জানিয়েছেন । পুরুলিয়ার জয়পুরে গতকাল এক জনসভায় তিনি বলেন, জীবন বিপন্ন করে কাজ করার দরকার নেই । এক্ষেত্রে রাজ্যসরকার ৫০ হাজার টাকা করে দেবে বলে তিনি প্রতিশ্রুতি দেন ।

রাজ্যের দক্ষিণবঙ্গের শুষ্ক ও খরাপীড়িত জেলাগুলিতে খরা মোকাবিলায় রাজ্য সরকার 'উষরমুক্তি' নামে একটি নতুন প্রকল্প চালু করতে চলেছে। পশ্চিম মেদিনীপুর, বাঁকুড়া, বীরভূম, ঝাড়গ্রাম, পুরুলিয়া ও পূর্ব মেদিনীপুরের ৫৫-টি ব্লকের ৪৭২-টি গ্রাম পঞ্চায়েত এলাকায় পঞ্চায়েত ও গ্রামোন্নয়ন দফতর ১-শো দিনের কাজ প্রকল্পে এর কাজ করবে। উষরমুক্তি প্রকল্পে এই জেলাগুলির ১৪ লক্ষ হেক্টর জমিতে সেচ ও ভূগর্ভস্থ জলের যোগানের উপরে বিশেষ গুরুত্ব দেওয়া হবে।

রাজ্য সরকার সুন্দরবনকে UNESCO World heritage site হিসেবে গড়ে তোলার পরিকল্পনা করেছে। উত্তর ২৪ পরগনা জেলা প্রশাসনের তরফে ইতিমধ্যেই এসংক্রান্ত একটি মাস্টার প্ল্যান রাজ্য পর্যটন দফতরে পাঠানো হয়েছে। সৌর বিদ্যুতকে কাজে লাগিয়ে পরিবেশ বান্ধব বিভিন্ন সুযোগ সুবিধে গড়ে ওই ম্যানগ্রোভ অরন্য এলাকাকে সারা বিশ্বের পর্যটকদের আকর্ষণের অন্যতম স্থান হিসেবে গড়ে তোলা হবে।

ভদ্রেশ্বরে পুরপ্রধান, মনোজ উপাধ্যায় হত্যা মামলায় ধৃত রাজু সাউ, বাবান যাদব ও প্রভু চৌধুরীকে আজ চন্দননগর আদালতে তোলা হবে ।

উল্লেখ্য, গত রবিবার রাতে সিআইডি উত্তর প্রদেশের ফৈজাবাদ থেকে তাঁদের গ্রেপ্তার করে ।

পশ্চিম মেদিনীপুরের কেশিয়াড়ী থানা এলাকার ভাসড়াঘাটের কাছে আজ সকালে তৃণমূল কংগ্রেসের নছিপুরের অঞ্চল সভাপতির দেহ উদ্ধার হয়েছে । পুলিশ জানিয়েছে, গতরাতে মৃত্যুঞ্জয় সাঁতরা নামে ঐ ব্যক্তি বাইক নিয়ে বেরেলোও বাড়ি ফেরেননি । আজ সকালে স্থানীয় বাসিন্দারা রাস্তার পাশে নয়ানজুলিতে মৃত্যুঞ্জয় বাবুর দেহ পড়ে থাকতে দেখে পুলিশে এবং তার ছেলেকে খবর দেয়। পুলিশ এসে দেহটি উদ্ধার করে । মৃতদেহের মুখে আঘাতের চিহ্ন ছিল । বাইকটিও নয়ানজুলি থেকে উদ্ধার করা হয়েছে ।

এদিকে, ঘটনাস্থলের খুব কাছে জঙ্গলের ভিতরে কয়েকটি তীর উদ্ধার হওয়ায় এলাকায় উত্তেজনা ছড়িয়েছে ।

বীরভূমের দুবরাজপুর শ্রীশ্রী রামকৃষ্ণ আশ্রমের উদ্যোগে ৫৭তম অভেদানন্দ মেলার সূচনা হয়েছে। আজ সর্ব ধর্ম সমন্বয়ে সাধু সম্মেলন শুরু হয়েছে ।

শতাব্দিক সন্ন্যাসী এতে যোগ দিয়েছেন । ৭ দিনের এই মেলায় নানা ধর্মীয় ও সাংস্কৃতিক অনুষ্ঠানের আয়োজন করা হয়েছে ।

উল্লেখ্য, ১৯৬০ সালে ঠাকুর সত্যানন্দ দেব এই মেলায় প্রতিষ্ঠা করেন ।

হুগলীর তারকেশ্বর থানার পুলিশ আজ ভোর রাতে ভীমপুরমোড় সংলগ্ন এলাকা থেকে ছয় দুষ্কৃতীকে গ্রেপ্তার করেছে । গোপন সূত্রে খবর পেয়ে ডাকাতির উদ্দেশ্যে জড়ো হওয়া এই ছ'জনকে পুলিশ পাকড়াও করে । তাদের কাছ থেকে ভোজালী, চেন এবং ডাকাতিতে ব্যবহৃত সরঞ্জাম উদ্ধার হয়েছে । এরা সকলেই তারকেশ্বরের বাসিন্দা । ধৃতদের চন্দননগর মহকুমা আদালতে তোলা হচ্ছে ।

পশ্চিম বর্ধমানের জামুড়িয়া থানা এলাকায় ১০ নম্বর রেল লাইনের পাশ থেকে এক কিশোরের পচাগলা দেহ উদ্ধার হয়েছে । পুলিশ জানিয়েছে, মহম্মদ জাফর আনসারি নামে বছর ১৭-র ঐ কিশোর গত দোসরা ডিসেম্বর থেকে নিখোঁজ ছিল । স্থানীয় বাসিন্দারা গতরাতে দেহটি দেখতে পেয়ে পুলিশে খবর দেয় । তদন্ত শুরু হয়েছে ।

দমদম ক্যান্টনমেন্ট স্টেশন সংলগ্ন রেল লাইনের পাশ থেকে আজ সকালে তার জড়ানো দুটি কন্টেনার এবং একটি গ্যাস সিলিন্ডার পড়ে থাকতে দেখে বোমাতঙ্ক ছড়ায় । স্থানীয় বাসিন্দা এবং রেল যাত্রীরা এগুলি দেখতে পেয়ে পুলিশে খবর দেয় । বোম্ব স্কোয়াডও আসে । পরে, এসআরপি শিয়ালদা সব্যসাচী রমন মিশ্র আমাদের সংবাদদাতাকে জানান, কোনো বোমা সেখানে পাওয়া যায়নি । জিনিসগুলি রেলের কর্মীরা লাইন সারাইয়ের জন্য ওখানে নিয়ে গিয়েছিলেন । তবে, এজন্য রেল চলাচলে কোন বিঘ্ন ঘটেনি ।

এই রাজ্য সহ সারা দেশের মানুষ এক বিরল মহাজাগতিক ঘটনার সাক্ষী হতে চলেছে । আজ রাতের আকাশে উল্কাবৃষ্টি দেখা যাবে । আকাশ পরিষ্কার থাকলে কলকাতা সহ সারা রাজ্যের মানুষ খালি চোখেই এই মহাজাগতিক ঘটনার সাক্ষী হতে পারবেন । জ্যোতির্বিজ্ঞানীরা জানিয়েছেন মহাকাশে থাকা পাথর ও বরফের টুকরো থেকেই এই উল্কাপাত হয় । আজ রাত ১০-টার পর থেকে

বৃহস্পতিবার ভোর রাত পর্যন্ত উত্তর-পূর্ব আকাশে মিয়ন রাশির
নক্ষত্রপুঞ্জের পাশে এই উল্কাপাত দেখা যাবে ।

নদীয়ার কল্যাণীতে বিধানচন্দ্র কৃষি বিশ্ববিদ্যালয়ের লেক হলে
জীবিকা উন্নয়নে ও পরিবেশ রক্ষায় বহুমুখী মিশ্র চাষ সম্পর্কিত
আজ এক আলোচনাসভার আয়োজন করা হয় । এর উদ্বোধন করে
স্টেট ব্যাঙ্ক অব ইন্ডিয়া'র কলকাতা সার্কেলের জেনারেল ম্যানেজার
শিবকুমার প্রভাকরন বলেন, প্রগতিশীল কৃষকদের উন্নয়নে, বিশেষ
করে শস্য ঋণ দেওয়ার ক্ষেত্রে স্টেট ব্যাঙ্ক অগ্রণী ভূমিকা নিয়েছে ।
বিধানচন্দ্র কৃষি বিশ্ববিদ্যালয়ের উপাচার্য অধ্যাপক ধরনীধর পাত্র
বলেন, কৃষকদের এখন কেবলমাত্র একটা চাষের ওপর নির্ভর করলে
চলবে না । বহুমুখী চাষ করতে হবে । নদীয়া জেলা পরিষদের
সভাপতি বাণীকুমার রায় জানান, রাসায়নিক সার অধিক মাত্রায়
দেওয়ার জন্য জমির উর্বরা শক্তি কমে যাচ্ছে । সেজন্যই মাটির
পরীক্ষা করা কৃষকদের ক্ষেত্রে অত্যন্ত জরুরী ।
অনুষ্ঠানে অন্যদের মধ্যে বক্তব্য রাখেন, ন্যাবার্ডের জেনারেল
ম্যানেজার বি আর পট্টনায়ক । স্টেট ব্যাঙ্ক অব ইন্ডিয়া অফিসার্স

অ্যাসোসিয়েশান, বেঙ্গল সার্কেল এই আলোচনাসভার আয়োজক ।
সারা জেলা থেকে শতাধিক কৃষক এই সভায় যোগ দেন বলে
অ্যাসোসিয়েশানের সাধারণ সম্পাদক সৌম্য দত্ত জানান ।

নদীয়ার কল্যাণী থানার গয়েশপুরের সুভাষপল্লীর একটি বাড়ি থেকে
এক স্কুল ছাত্রীর মৃতদেহ উদ্ধারের ঘটনায় ব্যাপক চাঞ্চল্য
ছড়িয়েছে। প্রিয়াংকা খান নামে ১১ বছরের ওই ছাত্রী নেতাজী
বালিকা বিদ্যালয়ে ষষ্ঠ শ্রেণীতে পড়ত। গতরাতে তাকে ঝুলন্ত
অবস্থায় পুলিশ বাড়ির একটি ঘর থেকে উদ্ধার করেছে। ওই
ছাত্রীর বাবা পিন্টু খানের অভিযোগ, কল্যাণী শিল্পাঞ্চল এলাকার
বাসিন্দা অশোক বাসফোর নামে এক কিশোর মেয়েকে উত্যক্ত
করত। তার কারণেই সে আত্মহনন করেছে। পুলিশ অশোককে ধরে
আজ কৃষ্ণনগর জুভেনাইল কোর্টে পাঠিয়েছে।
